

Ehuhuo-Ozi Polu Dejeñni Ndi Galeshja

¹ Mmẹ wu Polu de ẹkukwo-ozini. M wu onye-ozini pu-ichen—ele hun ihian zi mọbu hun ndi-okiki wu ihian tume—kani hun Jesu Kristi le Chuku-Nedi hun gha ime onwun weli Jesu Kristi tume. ² Mmẹ le umune enyi ime Kraisti ndi mmẹ le we ri ebeni gba de e. Enyi dejenni uka ri ichen-ichen risonme Azuun Galeshja ya.

³ Efoma le udon hun gha eka Osolobue Nedi enyi le Di-nwonni-enyi wu Jesu Kristi bia ya rini onu.

⁴ Nna enyi wu Jizos' Kraisti we ndun a ye make ifiri njo enyi, keni o gbapuha enyi ime eje-agboni ri ogenni, igi mezu uche Osolobue enyi wu Nedi enyi.

⁵ Ogho ya rini Osolobue Nedi enyi jenin ejen! Isee.

Ozioma Ozọ Arịa

⁶ O tu m enya ni unu a latomakenrinkezi onye hun gi ifiri efoma Kraisti kpo unu, nabanhanma “ozoma ozọ”. ⁷ Ele ni ozoma ozọ ri ari, kani o nwongho ndi ri e ye unu nsongbu, e me obi eruzile unu ali, a cho ni we rukpo ozoma Kraisti.

⁸ Kani, osuon'a ni enyi le enwen enyi mọbu mmọn-ozini ghadẹ enu-igwee bia e zime unu “ozoma” ozọ hun wulen hun enyi zi unu, onye ahun ya wuru onye we bu onu—ya la ntikpo jenin ejen! ⁹ Ke enyi don ku mbu, m rizi nwan e ku e: omeni onye owule ri e zi onu “ozoma” ozọ wulen hun onu nabanhanguu mbu, ya wuru onye we bu onu: ya la ntikpo jenin ejen!

Jesu Tume M, Ele Ihian

¹⁰ M riḍe nwan a cho ni ihian kuni m oḥunma ra Osolobue? Ra a cho maguḡo m nwan ni m me n'o suo ihian? Omeni echen ke m rikwo a cho ni m me n'o suo ihian, ya wu ni ele m igbon Kraisti.

¹¹ Umune m, m cho ni unu marin ni ozioma m zi aghani aka ihian bia; ¹² amunnarinni m ihian ya; ele ihian kuzi m'e. Kama, Jesu Kristi le enwen e we e ghosi m.

¹³ W'a ra ru uka a, unu a nuguḡo ke m don bi mbu, ogen m gi ri e fe ofufe ndi-Ju le nke Iwu Mozizi: ke m don kpokpokenme uka Osolobue, cho ni m tikpo a. ¹⁴ Ime ofufe enyi wu ndi Ju, mme ka ndi isi-otu m bu oda ofufe e fe ogen ahun. M'e mekenme oku omenali ndi nedi enyi we.

¹⁵ Kanj, ogen o gi suo Osolobue, hun gi efoma a hoto m, kpom—ke m riḍe efo nne m, ¹⁶ o no me m marin Nwa a, keni m zi ndi ani ndi ozo wuleni ndi Ju ozi banyeni ya wu Nwa a. Ogen o gi me e, ejenni m d'e kunrun ihian n'o gwa m ihien owule mobu buche ni m ihien owule. ¹⁷ Ejendeni m Jerusalem d'e kunrun ndi bu m uzḡo wuru ndi-ozu pu-ichen, kama, m no shi Arebia ozigbo. O meguu, m no gha ebegu kinhenzi Damas'kosi. ¹⁸ Ahua eto a ghafegu, m no shi Jerusalem d'a hun Kefasi wu Pita; m no son e nodi akp'ohin mmisen. ¹⁹ O nwonni onye ozo m hun ime ndi-ozu pu-ichen hoduni, wezuka Jemisi nwene Di-nwonni-enyi.

²⁰ M ri a gwa unu, id'enya Osolobue, ni ihienni m ri e de ni unu wu ezioku, ele ntu!

²¹ Omegu, m no jen Azuun Siria le Silisia. ²² Ndi uka Kraisti hun risonme egbere Judia e ke marin m omarin-enya ogen ahun. ²³ We nu a hu a nu ni we si

ni “Onye ahun te ri e kpokponi enyi mbu rizi nwan e zisonme ozi okukwe ahun o te cho n'o tikpo!”
 24 We no gi ifiri m ja efan Osolobue mma.

Isi Nke Ebuo

Pita, Jemisi le Jonu Nabanhan Polu Anabanhan

¹ O mepu ahua mmeno, m no shizi Jerusalem. Mmeme le Banabasi wi oge ahun, m nozi weri Taitosi. ² M jen ebenu makeni o nwon ihien Osolobue ghosi m; m no kowa ni we ozioma hun m ri e zi ebe ndi wuleni ndi Ju ri. Kanj m me e usuo —egbata mme le ndi we weri ni we wu ndi-isi suo —amamgbe o wuru ni m ri a gba oso olal'iwu mibu ni hun m gbafu a laguo iwi, o wuru ni orun m la iwi. ³ Awadeni we ikwa-ugun ye Taitosi mme le iya wi olu, osuon'a ni ele onye Ju, ni onye Grikiror— ⁴ kanj oku ikwa a ugun e te puhagho make ndi hun gi nzuzue rubanhan, e me ke si we wu ndi kwerini. We bia d'a hundele udi inwonrin-enwen hu enyi nwon ime Kraisti, keni we wezi enyi che ime igbon. ⁵ Kanj, enyi ekweyeni ni we kaka akpu-ohu, makeni enyi chokenme ni enyi chedon ni unu ezioku ri ozioma, keni unu marin a k'o richanrin.

⁶ Nke ndi hun no ke si we wu ndi-ndu—o nwonni ihien ohun we buche ni m. (Ihien owule we wu enwon ihien o wu ebe m ri, makeni Osolobue ara gbeyeni ihian.) ⁷ Mba. Kama, o wede we enya ni Osolobue e yeguo m orun igbashia ozioma ebe ndi kwaleni ugun ri, ya wu ndi ali ndi ozo wuleni ndi Ju, k'o don ye Pita orun igbashia n'a ebe ndi kwa ugun ri, ya wu ndi Ju. ⁸ (Makeni onye ohu hu gi Pita a run orun onye-ozu pu-ichen ime igunrun ndi Ju,

ndi kwa ugun, iya gizikwo mme nwen a run orun onye-ozu pu-ichen ime igunrun ndi wuleni ndi Ju, ya wu ndi kwaleni ugun.)⁹ Ogen Jemisi le Pita le Jonu, ndi hun we weri noke ndi-isi, gi hun ni aka Osolobue ri ime m, we no na mme le Banabasi aka, nabanhan enyi, ni enyi le we wu ohu. We no kwere n'og hugho mma ni mme le Banabasi jenne d'a runma ime ndi wuleni ndi Ju, ya wu ndi kwaleni ugun, uwe le enwen we a runma ime ndi Ju, ya wu ndi kwa ugun.¹⁰ Ihien ohu suo ke we sihu enyi me: enyi a nyanhankwo ndi-igbennye, hun a duzikwoni m.

Polu A Jugbo Pita Ime Antioku

¹¹ Kani, ogen Kefasi wu Pita gi bia Antioku, m jugbo a elee-m, elee-i, make ni o mefie hun we hun enya ogen ahun.¹² Make ni, ke ndi ahun Jemisi ziheleleni bia ebegu, Pita e son ndi wuleni ndi Ju e ri ihien-oriri. Kani, ogen ndini gi biagu, Pita no noye nko, o duzini ndi wuleni ndi Ju ri, make ni o ri a tu egun ndi ri itu ndi hun a kwadon ikwa-ugun.¹³ Ndi Ju ndi ozog ri ebegu no son e mememe ihunnai ahun, nke wu ni e dufiede we Banabasi le enwen e.¹⁴ Ogen m gi hun a ni ihien we ri e me le ezioku ri ozioma a dangbamani, m no no id'enya we ile si Pita, "Onye Ju ke i wu, kani i ri e bi ke ndi wuleni ndi Ju, y'a ra bi ke ndi Ju. Nani ke i donzi nwan a cho ni i wa obibi ndi Ju ye ndi wuleni ndi Ju olu?"

Okukwe Suo

¹⁵ M nozi si Pita, "Nke enyi le enwen enyi, ndi Ju mu enyi, enyi ele ndi hun w'a kpo 'ndi wuleni ndi Ju, ndi ome-njo.'

16 Bu enyi a maringho ni ele idonme Iwu ke Osolobue gi e kuni ihian ohunma, kani ikwerini Jesu Kristi, gi e e don enya. Ifiri e, enyi le enwen enyi e kweriguo ni Jesu Kristi, keni Osolobue kuni enyi ohunma, makeni enyi kwerini Kraisti, gi Kraisti e don enya, ele makeni enyi e donme Iwu Mozizi. Makeni, Osolobue ekukoni onye owule ohunma makeni onye ahun e donme Iwu. 17 Kani, o me nwan ni, ebe enyi no ri a cho ni Osolobue kuni enyi ohunma makeni enyi ri ime Kraisti, a hun w'a ni enyi le enwen enyi wu ndi njo, ya wu Kraisti a kwadon njo? Kaka! 18 O me nwan ni a tundonzime m ihien m tikpo, ya wu m ri a ghosi ni m dan Iwu ogen m gi tikpo a. 19 Eghee, makeni, e gigu m ihien ri ime Iwu nwunnahin Iwu, keni m hun uzorini Osolobue ndun. 20 A kpogbuguo we mme le Kraisti enu obe Kraisti. Elezi mme ri ndun, Kraisti ya ri ndun ime m. Ndunni m ri nwan e bi ime ehụ, m ri e bi e ghahani okukwe m nwe ime Nwa Osolobue, hun nwe ihien-osusuo m, we enwen e ye make ufiri m. 21 Emeko m efoma Osolobue wuru ihien na iwi—makeni, omeni ezie ro ni ihian donme Iwu, Osolobue e gi e kun'e ohunma, ya wu ni onwun Kraisti nwun la iwi!”

Isi Nke Eto

Iwu ra Okukwe?

1 Euu ndi Galeshia, ndi-nzuzu! Onye me onu ihienni? Bu id'enya unu ke we no ghosichanrin ni we kpogbu Kraisti elu obe. 2 Ihien ohuni suo ke m cho ni m marin: gwadele ni m, nani ke unu don nwehen Mmon-nso? Unu nwehen e ghahani idonme Iwu ra

ghahani ikweri ozioma unu nu? ³ Eriira ke unu e zuzuhan? Eka Mmon-nsọ ke unu gha bidon; onu ri nwan a liliima ni onu gi iken unu—iken ihian—mēchanrin a? ⁴ Ni m judele unu: afunfun nei ile unu ta wu nke olal'iwu? Ra o laguode iwu nke-esi? ⁵ Osolobue hun e ye unu Mmon-nsọ a, a run orun atu-nya ime igunrun unu, o ye unu ya makeni unu ri e donme Iwu Mozizi ra makeni unu hu a nu e kweri ihien unu nu?

⁶ Nke Ebrahim, Ehuho-nsọ si ni “O kweyeni Osolobue, Osolobue no gun a yen'e, kpo a onye ri ke Osolobue cho.” ⁷ Gi ni onwan marin ni ndi hun wu ezigbo umu Ebrahim wu ndi kwerini. ⁸ Ekukwo-nsọ e kutoguo a ni Osolobue jenkọ d'e gi ifiri okukwe ndi wulen ndi Ju kuni we ohunma; o si ni Chuku zi Ebrahim ozioma edei, si, “Ndi ani ile jenkọ d'e nwehen ngozi ghahani i.” ⁹ Ya wu, ndi hun kwerini k'e son Ebrahim hun kwerini wuru ndi we gozi agozi.

¹⁰ Ndi hu gi idonme Iwu e don nya a wuruole ndi we bu onu. Makeni, Ehuho-nsọ si, “Onye owule hun ghaleni e donme ihien ile we de ime ehuhuo Iwu, e henringuo onye we bu onu!” ¹¹ O wegwu nwan nya n'o nwonna onye owule hun Osolobue jenkọ d'e kuni ohunma makeni o donme Iwu. Onwan wu ezioku, makeni, Ehuho-nsọ si ni, “Okukwe ke onye ri ke Chuku cho k'e gi ri ndun,” ¹² bu ele okukwe ke Iwu gi a run, makeni, Iwu le enwen e e kuguo ni, “Onye hu hun ri e donme ihien ndini ile Iwu ku k'e gi ri ndun makeni o ri e donme we.”

¹³ Kraisi gbafuha enyi ime abumonu Iwu ghahani igi ifiri enyi henrin onye we bu onu. Makeni, Ekukwo-nsọ si ni, “Onye owule we hogbu elu osisi a

wuruoḷe onye we bu onu.” ¹⁴ O gbapuha enyi keni ngozi Osolobue gozi Ebrahim hun uzọ biani ndi ali ndi ozo ile hun wuleni ndi Ju, ghahani Kraisti wu Jizosi, keni enyi hun uzọ gi okukwe nwonhen Mmon-nsọ hun Osolobue kwe nkwa a.

Iwu Le Nkwa Osolobue

¹⁵ Umune m, ni m gi ihien w'e me uhuhin ile kowa ihien: madu ebuo kwerigbamahu banyeni ihien owule, biyegu a eka, o nwonni onye owule k'a saeka kagbu e mabu we ihien owule chen'e. ¹⁶ Ogen Osolobue gi kwe nkwa hu, o kwe Ebrahim le nwa a ya wu nkwa, Ehuho-nsọ asini “Umụ i” ya wu, hun kari onye ohu; kani o si “nwa i” ya wu ohu suo—hun wu Kraisti. ¹⁷ Ihien m gi e e ku wu ni Osolobue e biyegu nkwerigbama hu eka, tume e; ya wu ni Iwu we webanhan ogen o gi mepu orogbo ahua iri-kwasi-ogun kwasi nnu as'eka kagbu nkwerigbama hun Osolobue biyegu eka le nkwa o kwe ime nkwerigbama ahun. ¹⁸ Makeni, omeni idonme Iwu ke we gi e nwonhen ihien Osolobue kwe nkwa a, ya wu ni elezi n'o kwe nkwa hain we gi e nwehen e. Kani, ezioku-ezioku, Osolobue ye Ebrahim ya ofe igi mezu nkwa a.

Ki Hain Nwan We Gi Ye Iwu Hu?

¹⁹ Ki wuzi nwan mkpa Iwu hu ri? We webanhan a ni ihian e gi e a marin njo le mmefie, a marinzi njo we le mmefie we, d'e ru ogen nwa ahun, onye hu we kwe ya wu nkwa e gi bia. We gha eka ndi mmon-ozu tume ya wu Iwu, we e ye ukọ ye we. ²⁰ Kani w'a ra cho ukọ ebe onye ohu suo no e me ihien. Osolobue gi eka a me ihien e ogen o gi kwe Ebrahim nkwa ahun.

²¹ Ari m'e ku ni Iwu wu enenren nkwa Osolobue. Kaka akp'ohu! Makeni, omeni we te ye iwu hun a saeka e ye ihian ndun, nke o wuru ni, ezioku-ezioku, onye donme e, o wuru onye ri ochan. ²² Kani Ehuhuo-nsọ e kuguo a ni ihian ile ri ime egbun njo, ku e hun we enya, keni o wuru ni uzọ ohu sọọ ke we gi e nwehen ihien Osolobue kwe nkwa a. Uzọ ohu hu wu ikweri ni Jesu Kristi, gi Jesu Kristi e don enya: onye kweri, o nwehen e. ²³ Ke enyi keleni kweri ni Kraisti, Osolobue bu enyi donme okpuru Iwu, kpokin enyi ye, nọke ndi ngan, e che ogen okukwe e gi bia. ²⁴ Ya wu, Osolobue tumẹ Iwu n'ọ wuru ni enyi onye bu mkpinsin e lepu enyi enya, d'e ru ni Kraisti a bia, keni, o ru, o gi okweri enyi jenkọ d'e kweri ni Kraisti kuni enyi ohunma. ²⁵ Kani, hunni enyi kweriguu nwan, enyi arizi okpuru onye-nlepu-enya.

²⁶ Unu ile wu umu Osolobue ghahani okweri unu kwerini Kraisti wu Jizosi, ²⁷ makeni, onu ile, hun we buguu che ime Jesu Kristi ghahani ime onu mirin-Chuku, e yiriguu Kraisti. ²⁸ Ya wu ni o nwonzi ihien ri ichen egbata ndi Ju le ndi wuleni ndi Ju; egbata igbon le onye nwon enwen e; egbata ikennyẹ le ikpoho: enyi ile wu ohu ime Kraisti wu Jizosi. ²⁹ O me nwan ni enyi wu nke Kraisti, ya wu ni enyi wu umu Ebrahim, ni enyi k'e nwonhen ihien Osolobue kwe nkwa n'o k'e ye.

Isi Nke Eno

Unu E Nweringuo Enwen Unu!

¹ Ihien m ri e ku wu ni, ebe nwa ahun jenkọ d'e nwonrin ihien nedi e keleni ru ogo, o rihu ke igbon,

ihien ichen arị a, osuon'a nị ihien ile wu nke e.
² O risonme okpuru ndi e du n'e le ndi e lepụ a
 enya d'e ru ogen hu nedi e kaye. ³ Erira k'o ri enyi
 ke enyi keleni ru ogo, ya wu ke enyi keleni kweri,
 enyi wusonme igbon ihien ndi hun a ki obibi ri ime
 uwani. ⁴ Kani, mgbe ogen gi zu, Osolobue no zihē
 Nwa a; okpoho mu a; we mu a ye okpuru Iwu.
⁵ Osolobue zihē e n'o hun uzọ gbari ndi ri okpuru
 Iwu, keni enyi henrin umu Osolobue, umu Osolobue
 ru ogo umu. ⁶ Makeni unu wu umu, Osolobue no
 zihē Mmon nke Nwa a ye ime obi unu; Mmon ahun
 ri nwan ime enyi ile a hi, "Baba! Baba-Nedi m!" ⁷ Ya
 wu nwan ni y'elezi igbon; nwa ke i wu. Ebe o me ni
 nwa ke i wu, Osolobue k'e keye i ihien e.

E Kinle Ni Azuun Ime Egbun

⁸ Mgbe mbu, ogen unu keleni marin Osolobue,
 unu wu igbon mmon ndi hu furuleni w'e fe, unu e
 fe we e fe. ⁹ Kani hunni unu maringuu Osolobue
 —mba, hunni Osolobue maringuu unu, kini ke unu
 kinkozini azuun d'e kunrun mmon ndi ahun le
 ihien ndi hu ndun guu? Unu cho ni unu henrinzi
 igbon we? ¹⁰ Unu e mesonme mememe we gi a
 nyanhansonme uhuhin le ifon le ogen le ahua ri
 ichen-ichen! ¹¹ Egun unu rikwo a tu m, ni ikenkwo
 orun ile m run ebe onu ri a laguo iwi!

¹² M ri a rjo unu umune m, ri ni ke mme, makeni
 a riguo m ke unu. Unu emeni m njo. ¹³ Unu a
 maringho ni emu ri a kuni m ogen ahun wu ihien
 weheni m oghere m gi zi unu ozioma isi-ibuzo
 ahun. ¹⁴ Kani, osuon'a ni ehụ hun ri e songbuni m
 wuru ni unu ibu le ihien-nlele, unu elegberini m,
 unu ajuni m; kama, unu nabanhan m nọke si m wu

mmon-ozì Osolobue, nọkẹ sị m wu Kraịstị lẹ enwen ẹ. ¹⁵ Kì mezi ighoghọ hụ ile unu nwe oge hụ?! M k'a s'eka shia eri ni, omeni o ri nfe, nke unu e te gye m akpuru-nya unu, omeni o te k'e yeni m eka! ¹⁶ Ke m henrinni enenren onu makeni m gwa unu ezioku?

¹⁷ Ndi ahun ri nwan a lilima ni we dori onu, kani ele ihien ri mma ke we bu obi! Ihien we bu obi wu ni we wepu onu ebe unu ri, keni unu buchanrin obi unu che ebe we ri. ¹⁸ O hughokwo mma ibu obi e che ihien enina, e mekenme oku e—omeni ifiri ihien ri mma ro, omeni w'e me e oge ile—ele mme le unu nodihu suo.

¹⁹ Umụ m hun ri m obi, ime unu e memezi m, oku unu a kpamazi m, d'e ru ni unu e sonmeharin Kraịstị. ²⁰ K'o te ri m, m ri nwan ebe unu ri kikenni, keni m hun uzọ gb hutu olo, makeni obi eruzini m ali ebe unu ri!

Ihien Pọlu Gi Sara Le Haga Ghosi

²¹ Gwadele ni m, unu ndi choko ni unu ri okpuru Iwu, unu anuni ihien Iwu Mozizi ku? ²² We de e ime Iwu ni Ebrahim mu ikennyẹ ebuo: Haga, nne ohu wu igbon; Sara, nne hun-ebọ nwe enwen e, ele igbon. ²³ We mun'a hun nne e wu igbon ke ihian don a mu nwa; kani we mun'a hun nne e nwe enwen e ghahani nkwa Osolobue kwe.

²⁴ Enyi k'a s'eka gi ihien ndini ghosi ihien: ikpoho ebuoni nokin nya nkwerigbama ebuo. Ohu wu hun we no elu Ugu Sainai mme. Ohun ke Haga nokin nya a; o mu umu, a wuru we igbon. ²⁵ Haga nokin nya Ugu Sainai, hun ri ime atu ali Arebia. O ghosi obodo Jerusalem hun ri oge ni, makeni Jerusalem le ndi rin'a wu igbon kikenni. ²⁶ Kani

Jerusalem hụ hụ nri enu- igwee nwon enwen e, ele
igbon. Iya wu nne enyi. ²⁷ Make ni Ehuhuo-nsọ si,
“Ghoghoma nwan!

Iyü wu agan,
hü mutuleni nwa!

Kwankpoma ebu! Yime oro!

Iyü, hü marintuleni ufu-nwa!

Make ni, umu okpoho hü we jutö,

a kariguo

nke okpoho hü ya le di e bi!”

²⁸ Umune m, unu wu umu Osolobue ghahani
nkwa hü o kwe, nọke ke Aziki don wu. ²⁹ Kani, o
ri nwan k'o ri ogen hü: ogen ahun, nwa we mu ke
ihian don a mu nwa kpokpo hü we mu ghahani
Mmon nke Osolobue. ³⁰ Kani, kini ke Ehuhuo-nsọ
ku? O si, “Chupu igbon hü le nwa a; make ni nwa
igbon hü esonko nwa okpoho hü nwon enwen e
keri uku.”

³¹ Umune m, ya wu ni enyi ele nwan umu igbon-
okpoho hü, kama, umu okpoho hü nwe enwen e ke
enyi wu.

Isi Nke Isen

Unu E Weriguo kwö Enwen Unu!

¹ Kraisti gbafuha enyi keni enyi wuru ndi nwe
enwen we. Wuzokenme ni nwan ke ndi weriguu
enwen we! Anikwole ni we kpomazi unu egan
igbon!

² Gon ni ntin! Mme wu Polu ri a gwa onu ni
onu ni we kwa onu ungu, ya wu ni o nwonni erere
Kraisti k'a ban ni unu. ³ M ri a gwazi okennyé owule
hü k'a ni we kwa a ungu ya kwademekwo nwan
n'o donmeharın Iwu ile. ⁴ Onye owule ri nwan

e donme Iwu, e gi e e ro ni Osolobue ri e kun'e ohunma, a ghaguokwo ime Kraisti pu; o ghaguokwo ime efoma Osolobue danpu. ⁵ Kani, okukwe le iken Mmon-nsọ ke enyi nwen gi ri e chekenme ohunma ahun Osolobue jenkọ d'e kuni enyi, hun enyi ri a tu enya a. ⁶ Makeni, ime Kraisti wu Jizosi, ikwa-ugun le akwani-ugun enwonna ihien o wu. Ihien ri mkpa wu okukwe hun gi ihien-osusuọ a ghosi n'o hu a.

⁷ Unu te ri a gba-osọ ohunma! Onye bu uke che ni unu, unu gizileni e son ezioku? ⁸ Ekwọ Osolobue hun kpọ onu dunye onu udi odunyeni! ⁹ O rihu ke we don e ku e, “Ekerẹ yisti sọọ ke w'e buchehu, o ghagbari flawa bredi hu ile.” ¹⁰ Kani, makeni a maringho m ihien Di-nwonna-enyi k'a saeka me ime ndun onu, obi ru m ali ni unu eroko ihien ichen, sonme nkuzi ozo. Onye hu ri e nuhunmeni unu—onye owule o wu—k'a narinri afunfun rin'a.

¹¹ Umune m, omeni echen ke m rikwo a kuzi ni ikwa-ugun ri mkpa, ki haizni we gi e kpokpo m? Omeni ezioku ro ni m ri a kuzi ni ikwa-ugun ri mkpa, ya wu ni ozi m ri e zi banyeni obe Kraisti e ke gha e buhe oku. ¹² K'o ri m, ndi hu ri e ye unu nsongbu e jen d'a warade enwen we, edede ikwa-ugun sọ!

Anile Enwen I Ki I

¹³ O me nke unu umune m, Osolobue kpọ unu d'e weri enwen unu. Kani, egikwole ni ni onu e weriguọ enwen onu memẹ k'o ri onu, rike ihian-mmaka; ka gi ni ihien-osusuọ e fetari ibe unu. ¹⁴ Makeni, we wegbamachanrin Iwu ile che ime akpu iwu ohu hun wu “Ihien ibe i k'a suoriri i ke ihien enwen i don a sọọ i.” ¹⁵ Kani, omeni unu hu

a tagbu ibe onu e ri, kpachanfukwo ni nwan enya, amangbe onu e gbupu ibe onu!

Mmon-nso Le Ihian-mmaka

¹⁶ M si unu, a ni ni nwan Mmon-nso a ki unu, make unu gha e me ke ihian-mmaka. ¹⁷ Make ni, ihien ihian-mmaka a cho ele ihien Mmon-nso a cho; ihien Mmon-nso a cho ele ihien ihian-mmaka a cho. We ebuo a luson ibe we ogun, nke wu ni, y'a saeka me ihien i cho. ¹⁸ Kanj, omeni Mmon-nso ri e du unu, ya wu ni unu arizi okpuru iwu.

¹⁹ Ihien ihian-mmaka e me puhachanrin ifon; we wu ihien ndini: ughere, ibi obibi rileni ochan, ime ihien-ifenren, ²⁰ irua-mmon, ibu-nshi le igi iken eje-mmon a run, idu-enenren, ikpe, enya-ufu, eje-olulu, icho nke-i nke-i, nkebe, izuo eka-nke, ²¹ iwe-enya, igbu-ochu, ira-manyu tu, eje-mmemme le ihien ndi ozozon erira. M ri nwan a gba unu mkpinsin-eka ke m don gba unu ya mbu, ni ndi hun e me ihien ndi no erira a banko Ali-eze Osolobue.

²² Kanj, ihien Mmon-nso a mipuha wu: ihien-osusu, ighoghoh, udon, ndidi, efoma, ime-mma, iwu onye we gi e don enya, ²³ ime-juu, ikwondon-enwen-ihian. Onye me ihien ndini adanni iwu owule. ²⁴ Ndi hun wu nke Kraisti wu Jizosi a kpogbuguo ihian-mmaka we te wu le ihien a gunn'a le ihien a sunn'a enu obe Kraisti. ²⁵ Ebe o me ni Mmon-nso e ye enyi ndun, ni enyi e bi ni nwan ke ndi Mmon-nso ri a ki. ²⁶ Ele hun enyi e gi a pache mobu a kpasu ibe enyi iwe mobu e we ni ibe enyi iwe-enya.

Isi Nke Isin

E Bu Ni Ibu Ibe Unu

¹ Umune m, onye me njo, unu ndi ri e bi ke Mmon-nsọ cho, gi ni nwayo wekinhen e. Ka kpachanpukwo ni enya amangbe onwunwan a biazikwo ni unu nwen. ² E bu ni ibu ibe onu. Unu gha e me e, ya wu ni onu hu e mezu iwu Kraisti. ³ Onye ri e ro n'o nwongho ihien o wu bu o nwonna ihien o wu ri e dufie enwen e. ⁴ Onye-onye ya lele ihien o ri e me. Omeni o hugho mma, ya honron make ihien ri mma o me, ka y'e gile enwen e tuni onye ozo, ⁵ makeni onye-onye furu n'o buru ibu e.

⁶ Ndi we ri a kuzi oku-Chuku furu ni we keye ndi ri a kuzi ni we oku-Chuku ihien-oma owule we nwon. ⁷ Edufiekwole ni enwen onu: Osolobue anikokwo onye owule megbu e; ihien onye kun k'o k'a ghorị. ⁸ Omeni ugbo we kunye e wu ime-ihien a suo ni we, we k'a gha ugbo hu ghorị ntikpo; omeni ugbo ime-ihien a suo Mmon-nsọ ke we kunye e, we k'a gha ebenu ghorị ndun-itebite. ⁹ Ya wu, ndun ime ihien ri mma y'a gukwole enyi. Makeni, omeni enyi anini ndun guu enyi, ogen ru, enyi jenko d'e ri erere e. ¹⁰ Ya wu, ni enyi gi ni nwan oghere ile enyi nwe e me ni onye owule ohunma, tumadu ndi hun ri ikpun-ulọ okukwe.

Mkpinsin-eka Ikpazuun Le Ekele

¹¹ LEE NI AKPURU-ekukwo NDINI NO JAGBO-JAGBO M GI eka M DENI onu. ¹² Ndi hun ri a cho ni we gi ihien enya e legha du eka obi, uwe ri nwan a cho ni we wa ikwa-ugun ye unu olu. We ri e me e amangbe we e gi ifiri obe Kraisti kpokpo we. ¹³ Ke ndi hun kwa ugun le enwen we aride e donme Iwu, bu we hu a cho ni unu kwa ugun keni we gi ihien ri unu ehun nyan isi: ni unu e donmeguo omenali hun w'e legha

enya. ¹⁴ O bughari m! Egiko m ihien owule nyan isi, wezuka obe Nna enyi wu Jesu Kristi. E giguwo we obe hu kpogbu uwani—o wuru ihien nwunni ebe m ri, gizikwo obe hu kpogbu m—a wuru m ihien nwunni ebe uwa ri. ¹⁵ Ke ikwa-ugun ke akwani-ugun arini mkpa, kaka! Ihien ri mkpa wu ni we kedonzi ihian. ¹⁶ Udon le omiken ya rini ke we han gi usonronni e bi—uwe wu ndi Izrelu Osolobue nke-esi!

¹⁷ Gha ogeenni e jen, onye owule egizile oku ikwa-ugun ye m nsongbu, makeni apa ehụ we rusonme m make ufiri Jesu husonme m ehụ.

¹⁸ Umune m, efoma Onye-nwonni-enyi wu Jesu Kristi ya noyeni unu ime-mmom. Isee.

**Elu Ọhụn: Ekwkwọ-Nsọ (Azụn Ọhụn rịn'a)
Revision of New Testament in Ika**

copyright © 2010 Wycliffe

Language: Ika

Translation by: Wycliffe

Ika (ikk) Nigeria

In Nigeria the word Ika is not only the name of the Ika people, but is also used to designate a local government area in the Akwa Ibom State. The Ika people are a sub group of the Igbo people. It is interesting to note that Ika is the name of a town in Croatia is one of the eight Annang local government areas of the local government areas in Akwa Ibom State. An alternative name for the Ika people is Ika-Annang. There appears to be another dialect of Ika that is spoken in Delta State of Nigeria.

Copyright Information

© 2010, Wycliffe. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789037056

Revision

The New Testament

in Ika

© 2010, Wycliffe. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 11 Nov 2022 from source files dated 29 Jan 2022

31b0248e-272a-5dee-8226-bcc00c54d9b1